



Peter Olsen  
Inatsisartunut ilaasortaq, Inuit Ataqtigiit

**Akissuteqaat § 37 naapertorlugu apeqquteqaammut, - meeqqat inuusuttullu timersornerat pillugu**

28.02.2018

Asasara Peter Olsen

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: ikiin@nanoq.gl  
www.nanoq.gl

Qujanaq apeqqutinnut, Inatsisartut suleriaasianni aalajangersakkat naapertorlugit saqqummiussannut. Taakkua uani ataani akissuteqarfigissavakka.

*Apeqqu 1: Nunatsinni pissartanngorniunnerit avataasigut unamminernut atatillugu timersoqatigiiffiit angalanermut aningaasartuutaannut aningaasanik immikkut atugassiinikkut meeqqat inuusuttullu timersornerisa nukittorsarnissaat kissaatigigaanni, tamanna aningaasanut inatsimmi kontomi 40.94.13 Timersornermut tapiissutinut aningaasat immikkoortinneqartut aqutugalugit aqqiivigineqarsinnaava?*

**Akissut:** Naalakkersuisut malugeqqussavaat timersoqatigiiffinnut toqqaannartumik tapiissuteqartoqartanngimmat timersoqatigiiffiit angalanernut aningaasartuutaasa matussutissaannik, nunatsinni pissartanngorniuttarnernut atatillugu. Tapiissutit tunniunneqartarput Kalaallit Nunaanni Timersoqatigiiffiit Kattuffiannut, ataatsimoortut killiliussatut tapiissutit allaffissornermut, sulisunik, aqutsisunik sungiusaasartunillu ilinniartitsisarnernut, timersoqatigiit kattuiffiitunut ataasiakkaanut timersoqatigiiffinnullu ilaasortaasunut ataasiakkaanut, nunarsuarmiut unammersuaartarnerini peqataasarnernut nunarsuarmiullu akornanni timersornermut tunngasuni suleqatigiinnermut aningaasaliissutit. Kalaallit Nunaanni Timersoqatigiiffiit Kattuffiata tapiissutit ilaasortaminut ingerlateqqittarpai, taakkualu aningaasaliissutit atorsinnaavaat ilaatigut unammersuaarnissanut atatillugu angalanermut aningaasartuutinut.

Naalakkersuisut Timersoqatigiiffiit Kattuffiannut naammassisassanut isumaqatigiissuteqartarput Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq naapertorlugu. Taamaattumik periarfissaqarpoq Kalaallit Nunaanni Timersoqatigiiffiit Kattuffiannut isumaqatigiissuteqarnissamut, suliniuteqarnissaq meeqqat inuusuttuaqqallu timersornermik ingerlatsisarnerisa siuarsarneqarnissaat pillugu. Tamatumunnga siunertamut immikkuullarissumut immikkut tapiissuteqartoqartarnissaa siunnerfiussappat tamanna pisinnaassaaq Aningaasanut inatsimmi kontumi pingaarnermi 40.94.13 Timersornermut Tapiissutit aqutugalugit.

*Apeqqu 2: Aningaasanik atugassiinermi inatsisit allanngortinnissat pisariaqarpa, tamannaluunniit Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq naapertorlugu aningaasat akilerneqarsinnaappat?*

**Akissut:** Naalakkersuisut qinissappassuk aningaasaliissutinik siunertanut pineqartunut immikkoortitsisoqartalernissaa, tamanna Timersorneq timigissarnerlu pillugit Inatsisartut inatsisaannik nr. 15, 6. juni 2016-imeersumik allannguinissamik pisariaqartitsissanngilaq, inatsimmi tassani § 11, imm. 3-mi periarfissaqareermat aningaasaliissutit ilaannik siunertanut aalajangersimasunut immikkoortitsisoqartarsinnaanera.

Inussiarnersumik inuulluaqqusillunga



Doris J. Jensen